



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

Kolegij načelnika USK

Načelnici opština i gradova Unsko-sanskog kantona održali su, dana 13.10.2017. godine svoj redovni kolegij, kojem je ovoga puta bila domaćin opština Bužim.

Problemi lokalnih zajednica i zajedničke aktivnosti na njihovom rješavanju i ovaj put su bili na dnevnom redu kolegija načelnika.

Stanje u oblasti socijalne zaštite trenutno je jedan od gorućih problema s obzirom na to da Unsko-sanski kanton na ime naknada za trudničko i porodijsko bolovanje duguje više od četiri miliona maraka.

Istaknuto je da bi Vlada Kantona morala pod hitno da izmiri dugovanja, jer je to njena zakonska obaveza, a i da ne bi došlo do blokade računa socijalnih ustanova, preko kojih se vrši implementacija, a potom i budžeta opština i gradova ovih ustanova.

Bilo je riječi i o nedavno donesenim Zakonima o državnoj službi i turističkim zajednicama, kao i o poslovnim zonama, te poboljšanju poslovnog ambijenta u Kantonu.



Načelnici na sastanku u Bužimu

Također, načelnici su istakli kako su nezadovoljni sa Zakonom o povećanju akcize na naftne derivate, te da je kao takav direktan udarac na građane.

I ovom prilikom je izraženo nezadovoljstvo nedovoljnim investiranjem u Kanton, kao i stalnom nemilosrdnom eksploatacijom šuma sa područja Opštine Bosanski Petrovac, čime se ignoriše i praktično ismijava presuda Ustavnog suda, koja je jasno objelodanila nepravdu prema ovoj Opštini i ljudima koji tu žive.

Također je izraženo nezadovoljstvo i ogorčenost načinom i metodom opstruiranja investitora Arifagić Jusufa od strane stranačkih kantonalnih struktura, što je van pameti, imajući u vidu hiljade hektara puste državne zemlje na području naše Opštine.

Nezadovoljstvo ulaganjima u Unsko-sanski kanton u proteklih 20 godina zasnovano je na činjeničnom stanju, te lokalne zajednice zahtijevaju hitnu promjenu odnosa svih viših nivoa vlasti, istaknuto je na sjednici kolegija načelnika i gradonačelnika.

Načelniku Hujiću dodijeljena plaketa za “Ličnost godine USK”

Dana, 2.10.2017. godine u Travniku je održan “Drugi poslovni forum” Evropskog pokreta, na kojem su uručene plakete i zahvalnice istaknutim pojedincima i kolektivima koji su dali doprinos razvoju i promociji evropskih vrijednosti u BiH i regionu.

Načelniku Opštine Bosanski Petrovac, Zlatku Hujiću, plaketu za “Ličnost godine USK” uručio je lično visoki predstavnik Valentin Inzko.

Među mnogobrojnim zvanicama i gostima, koji su primili nagradu bio je i načelnik Hujić, koji je prepoznat kao čovjek koji se od prvoga dana zalaže za svoj grad, nepraveći nikakvu razliku među ljudima, bez obzira na vjersku, nacionalnu ili bilo koju drugu pripadnost. Nailazi na poteškoće, boreći se za ovakva načela, ali nastavlja dalje svojom kosmopolitskom vizijom i ovo priznanje je samo potvrda i podrška, Pokreta za Evropu, njegovoj ličnosti i nastojanju.

Plaketa je odraz dugogodišnjeg zalaganja, truda i vizije načelnika Hujića u nastojanju da naša Opština, rodno mjesto četiri velikana, dobije zasluženno mjesto u privrednoj, ekonomskoj, kulturnoj i svakoj drugoj sferi uspješnosti, u Unsko-sanskom kantonu, ali i šire.

U okviru Poslovnog foruma održana je i svečana akademija “Vrijeme je za Evropu”, sve povodom obilježavanja Dana Evrope u BiH.

Na manifestaciji su bili prisutni brojni uzvanici i ugledni gosti kao što su visoki predstavnik u BiH, gđin Valentin Inzko, gradonačelnik Zagreba, Milan Bandić, brojni ministri i načelnici općina, a među gostima je bio i trener Miroslav Čiro Blažević.

Predsjednik Evropskog pokreta u BiH, Predrag Praštalo je kazao kako postoji mnogo priča koje su pozitivne, te da se Evropski pokret u BiH trudi da ih prepozna i nagradi.



Valentin Inzko uručuje načelniku Hujiću plaketu

Inicijativa za lokalne vlasti

U organizaciji Ureda specijalnog predstavnika EU u BiH, gospodina Wigemarka, zajedno sa partnerima USAID i Ambasdom Švicarske, u Bihaću je dana, 23.10.2017. godine održan sastanak krajiških gradonačelnika i načelnika sa komesarima Zajedničke komisije Inicijative za lokalne vlasti.

Gradonačelnici Bihaća i Cazina, te načelnici Ključa, Sanskog Mosta, Bosanske Krupe, Bužima i naše

Opštine, razgovarali su sa komesarima Zajedničke komisije Giorgiom Brosiom, Regulom Bäblerom, Károlyjem (Charlesom) Jókayem i Mladenom Milanovićem o aktuelnom stanju u ovim lokalnim zajednicama, kao i o odnosu viših nivoa vlasti prema gradovima i općinama.

Ovo je naročito važno zbog nezadovoljstva šest općina našeg Kantona, odnosom Vlade i premijera USK-a, prema njima. (Bihać, Cazin, Ključ, Bosanska Krupa, Bužim, Bosanski Petrovac).

Naš načelnik je opet istakao probleme u našoj lokalnoj zajednici, govoreći o neprovođenju i ignorisanju presude Ustavnog suda, u smislu visine naknade posječene šume i bezobzirnoj i gotovo neshvatljivoj raspodjeli minimalne dobiti USK šuma od strane Vlade.

On je istakao i apsurdno opstruiranje investitora Jusufa Arifagića, imajući u vidu pustu državnu zemlju na području naše Opštine, kao i o statusu i ustrojstvu Kantona kao potpuno nepotrebnog nivoa vlasti, između lokalnih zajednica i države.

Također je naveo pozitivan primjer d.o.o Pirnara, koji uskoro završava svoj novi objekat u poslovnoj zoni Gorinčani, te samim tim otvara mogućnost novog zapošljavanja i doprinosi razvoju privrede i ekonomske ekspanzije cijelog regiona.

Inače, Inicijativa za lokalne vlasti predstavljena je 18.10.2017. godine u Sarajevu, a namjera je pomoći entitetima i lokalnim vlastima u cijeloj BiH da prepoznaju suštinske probleme i načine na koji su organizirane i finansirane, te one koji sprečavaju njihovu sposobnost da građanima pruže adekvatnije usluge.

Dalje, cilj održavanja sastanka sa čelnicima lokalnih zajednica je i da Ured specijalnog predstavnika EU u BiH bude upoznat sa ovim, te nakon temeljne analize na teritoriju cijele BiH donese određene preporuke, sugestije i zaključke a najkasnije do maja 2018. godine.

Ova Komisija nema naredbodavnu, niti izvršnu funkciju.



Na sastanku u Bihaću

Opštini donirana računarska i kancelarijska oprema

Dana, 30.10.2017. godine Opštini Bosanski Petrovac uručena je donacija u vidu računarske i kancelarijske opreme od strane Hilswerk Austria International, a u ime donatora UNHCR-a.

Predmet ugovora, kojeg je potpisao načelnik Zlatko Hujčić, je regulisanje međusobnih odnosa i obaveza između ugovorenih strana za realizaciju dijela projekta koji se odnosi na podršku jačanja lokalnih kapaciteta u svrhu pružanja trajnih rješenja za interno raseljene i povratničke porodice, putem prikupljanja i upravljanja podacima o njihovoj ugroženosti na lokalnom nivou.

Pored računarske i kancelarijske opreme, za predstavnice Opštine, Sabrinu Didović i Bobanu Velagu, obezbijedena je obuka za rad na računaru, a u svrhu prikupljanja podataka u vezi sa raseljenim i povratničkim porodicama, a radi formiranja kvalitetne baze podataka, na osnovu koje će se moći pristupiti raznim donatorskim fondovima.

Oprema koja je donirana sastoji se od 2 računara- laptopa sa torbom, 2 Microsoft Windowsa, 2 MS Office, 2 optička miša, 2 USB, 1 printer sa dva tonera, 1 projektor sa torbom, 1 digitalni fotoaparata sa futrolom i memorijskom karticom, 30 omota papira za kopiranje A4.

Podsjećamo da je najveće donacije u našoj Opštini implementirao upravo Hilswerk Austria International, koji je u okviru projektnih aktivnosti u periodu od 3 godine stambeno zbrinuo 17 korisnika, za šta ukupna utrošena sredstva iznose cca 615.000,00 KM.

Također, u okviru HWA realizovana je komponenta ekonomske održivosti, kako bi radom sposobni stekli mogućnost za ekonomsko osnaživanje i ostvarenje prihoda, u vrijednosti od 22.000,00 KM.



Prilikom preuzimanja donirane opreme

Dan polja soje u našoj Opštini

Krajem septembra, u našoj Opštini je organizovana posjeta oglednim parcelama soje, u saradnji GIZ-a (Njemačka organizacija za internacionalnu saradnju), Poljoprivrednog zavoda iz Bihaća i Opštinske službe.

S obzirom da je 2017. godina okarakterisana kao jedna od najtežih godina za poljoprivrednu proizvodnju sa aspekta vremenskih, odnosno klimatskih uslova, a i pojave nevremena sa ledom, svi usjevi na području naše Opštine su manje uspješni, pa tako i soja.

Bez obzira na ove objektivne teškoće, koje su pratile realizaciju projektnih aktivnosti, postignut je veliki uspjeh u podizanju svijesti kod poljoprivrednih proizvođača o proizvodnji i upotrebi soje, također, podignut je nivo znanja u agrotehnici i širenju areala uzgoja soje na višim nadmorskim visinama.

Podsjećamo da je proizvodnja soje na oglednim parcelama u našoj Opštini dio projekta „Kvalitetna soja bez GMO iz Dunavske regije“ koju provodi GIZ u Srbiji i BiH od 2014. do 2017. godine.

U sklopu ovog projekta provedeno je niz aktivnosti u Opštini Bosanski Petrovac, kao što su: Zimska škola o uzgoju soje, sadnja 4 sorte soje na imanju dva poljoprivredna proizvođača, Fazlić Džemila iz Rašinovca i Karanović Gorana iz Vrtoča, kao i trening o uzgoju za zainteresovane poljoprivrednike.

Unsko-sanski kanton je prepoznat kao važan region u proizvodnji ove kulture, pa su se tako pored naše Opštine navedene aktivnosti provodile i u Bihaću, Cazinu i Sanskom Mostu.

Obilazak oglednih parcela soje





(Ne)rodna polja

Dolaskom velikog investitora u poljoprivredi, Jusufa Arifagića, u Bosansku Krupu prije dvije godine, pusta državna zemlja postaje plodna.

Kada će se to desiti na istim i još većim prostranstvima Bosanskog Petrovca, gdje je, također, ovaj investitor došao...????

Njive u Bosanskoj Krupi...



“Pirnar” proširuje proizvodni pogon

Poslovna mapa Opštine Bosanski Petrovac od 2007. godine postala je sadržanija za PIRNAR – privrednim subjektom koji od osnivanja pa do danas bilježi konstantu razvoja.

Povećanje broja uposlenih, tehničko-tehnološke opremljenosti i produktivnosti, a od prije par mjeseci, i početak izgradnje nove proizvodne hale u poslovnoj zoni Gorinčani samo su neki od elemenata kojima uposleni to potvrđuju, predvođeni stručnim menadžmentom sa Sandijem Terzićem na čelu.

Izgradnjom i otvaranjem novog poslovnog prostora, sa što bolje urađenom infrastrukturom i drugim pogodnostima nastoji se obezbijediti bolji poslovni ambijent i kvalitetniji život u našoj Opštini.

Prije dolaska na postojeću lokaciju Pirnar je djelatnost veoma uspješno obavljao u Sloveniji, odakle je i vlasnik kapitala, odnosno investitor.

Od prije nekoliko mjeseci, stvorila se potreba za proširenjem proizvodnje, pa i samog radnog prostora.

Tako je, nakon pronalaska i kupovine zemljišta u poslovnoj zoni Gorinčani, Pirnar počeo sa izgradnjom nove proizvodne hale, čija je površina 22 000 m².

U razgovoru sa direktorom Sandijem Terzićem saznali smo da se radovi na izgradnji odvijaju po planu, a otkrio nam je i datum zvaničnog otvorenja hale, 1. maj 2018. godine, kada će proizvodni pogoni biti spremni za rad.

Također, ono što je bitno istaknuti je da firma Pirnar nedavno kupljenu zgradu, poznatu kao “bijelu zgradu”, adaptira za stanove namijenjene radnicima, “ne samo radnicima, nego i za porodice radnika”, direktor Terzić posebno naglašava.

Proširenje proizvodnje donosi i nova zapošljavanja, Terzić navodi otvaranje 50-100 novih radnih mjesta.

Firma Pirnar, pored toga što zapošljava lokalno stanovništvo, poznata je i po brojnim donacijama za lokalnu zajednicu. Podsjećamo da je ova firma obezbijedila kompletnu opremu za

Radio Bosanski Petrovac, te su svake godine sponzori organizovanja manifestacije Prvomajske trke.

Pirnar je jedan od najvećih izvoznika na području Unsko-sanskog kantona, svoj kompletan proizvodni program izvozi u zemlje Evrope, ali i šire.

“Poslovna etika i kvalitet, u sintezi sa stručnošću i iskustvom, što predstavlja osnovne elemente koje smo usvojili, garancija su našeg dugoročnog uspješnog poslovanja”, ističe na kraju Sandi Terzić.



Sandi Terzić prošle godine osnovnoj školi donirao nove tablete



Gradilište Pirnara u poslovnoj zoni Gorinčani

Dan Osnovne škole "Ahmet Hromadžić"

U Domu kulture svečanim programom 11. oktobra obilježen je Dan Osnovne škole „Ahmet Hromadžić“.

Program je počeo učeničkim riječima oživljavajući lik i djelo Ahmeta Hromadžića koji je rođen na ovaj dan i po kome škola ponosno i nosi naziv.

Potom, obratila se i direktorica Mujesira Kavaz koja je

prisutnima poželila dobrodošlicu, otvorivši kulturno-zabavni dio svečanosti.

Kako samo mogu i znaju djeca, tako su i ove godine obilježili Dan škole, od najmanjih do najvećih svi su dali svoj doprinos.

Na početku su najmlađi, pjesmom, plesom i recitacijom predstavili svoju kreativnost i umijeće, potom se predstavio drugi razred sa tačkom "Mi smo đaci veseljacii".

Nakon njih, učenici trećeg razreda izveli su recitaciju "Dvadeset osma pjesma pravdina" i pjesmu "Igrajmo se svi", a drugo odjeljenje tačku "Želim, želim".

Peti razred se predstavio sa recitacijom "Volim školu", plesom "Šaputanje", a potom pjesmom o pravu i ljubavi.

Na kraju svečanosti, i školski hor je pjesmom školi uputio čestitku za rođendan.

Druženje uz pjesmu, ples, recitaciju i igru još jednom je ostavilo potpis na izreku: „ od kolijevke, pa do groba-najljepše je đачko doba“.

Obilježavanju je pored učenika osnovne škole, roditelja djece, brojnih građana, predstavnika kulturnog i javnog života naše Opštine, prisustvovao i načelnik, Zlatko Hujčić.



Dan osnovne škole proslavljen u Domu kulture

125. godina župe Krnjeuša

Dana, 8.10.2017. godine obilježena je 125. godišnjica osnivanja župe Krnjeuša. Obilježavanje je upriličeno u organizaciji Banjalučke biskupije i župe Drvar-Bosanski Petrovac.

Održana je Sveta misa koju je predvodio biskup Komarica, u Krnjeuši, na groblju „Kod križa“, jedinom još uvijek vidljivom tragu postojanja ove župe krnjeušskog župnika Krešimira Barišića, za kojeg je, prije Mise posebno bila upriličena molitva.

Za vrijeme Mise biskup Komarica je posvetio novoizgrađeni kameni oltar postavljen ispred ranije podignutog spomen-križa, a na kraju Mise blagoslovio je spomen-ploču u čast stradalih vjernika iz nekadašnje župe, tokom II svj.rata.

Ceremonija obilježavanja nastavljena je u Domu kulture u našoj Opštini, gdje je upriličena Svečana akademija.

U svom izlaganju o župi Krnjeuša, Davor Klečina, istakao je da je katoličkih stanovnika znatno manje od samog osnivanja župe u Opštini Bosanski Petrovac, te da su vjernici raseljeni širom svijeta.

Župa Krnjeuša osnovana je 1892. godine, kada je izgrađena i župna crkva Blažene Djevice Marije, kako je istakao banjalučki biskup Franjo

Komarica, groblje Križ u Krnjeuši je mjesto istine i pijeteta za sve vjernike ove župe.

Svečanoj akademiji, pored brojnih gostiju, vjernika iz naše Opštine, prisustvovao je i načelnik Opštine Bosanski Petrovac, Zlatko Hujčić.



Biskup Franjo Komarica u Domu kulture

Ismeta Dervoz u posjeti našoj Opštini

Ismeta Dervoz, poslanica u predstavničkom domu Parlamentarne skupštine BiH, članica Stalne delegacije u Parlamentarnoj skupštini Vijeća Evrope, koordinadora na projektu omladinskih koordinatora Vijeća Evrope, posjetila je, dana 13.10.2017. godine Opštinu Bosanski Petrovac, gdje je u Kabinetu načelnika dočekaio načelnik Zlatko Hujčić.

Cilj posjete je bio upravo projekat omladinskih koordinatora, kojeg provodi Vijeće Evrope u 19 opština u BiH, među kojima je i naša.

Namjena ovog projekta je da se podrže zagovaranja omladine, usmjeravanje pozitivne energije mladih ljudi u cilju doprinosa kvalitete života u opštini, što je bila i tema jučerašnjeg sastanka.

Radnom sastanku prisustvovala je omladinska koordinadora iz naše Opštine, Amila Bešić, koja je učestvovala u obuci koja se održavala u Neumu, gdje se zajedno sa ostalim koordinatorima osposobila sa potrebnim vještinama za organizaciju aktivnosti uključujući što veći broj mladih ljudi.

Ismeta Dervoz se zahvalila načelniku na domaćinskom dočeku, istaknuvši da Opština Bosanski Petrovac i mlade koordinatore računaju na njenu pomoć i podršku u implementaciji ovog projekta.



S lijeva na desno: Dragana Manojlović, načelnik Hujčić, Ismeta Dervoz, Amila Bešić

Prvi mjesni zbor u MZ Kapljuh, Janjila

U organizaciji mjesne zajednice Kapljuh, dana 14.10.2017. godine organizovan je prvi mjesni zbor.

Zbor je počeo u 10 sati, liturgijom u mjesnoj crkvi koja je posvećena Pokrovu Presvete Bogorodice.

Oko 80 vjernika iz ove mjesne zajednice, ali iz susjednih se okupilo da uveliča ovaj događaj, te da na neki način bude garancija da će zbor postati tradicija.

Njegovanje starih običaja i ovaj put se pokazalo kao temelj istinskih i pravih vrijednosti.

Nakon liturgije, sveštenik Nikola Arkula istakao je da je prijatno iznenađen brojem prisutnih vjernika, te da se nada da će uskoro crkva, koja je još uvijek u pocesu obnavljanja, biti završena, pa potom i osvećena.

Također, sveštenik Jovan Banjac, čija je i parohija se zahvalio vjernicima na dolasku, te pozvao na zajednički ručak, u čast Slave crkve.

Predsjednik mjesne zajednice, Kecman Duško: "Danas smo se okupili da crkvenu Slavu ovog mjesta proslavimo, a i da okupljanje i druženje postane tradicija koju ćemo negovati. Veliko hvala upućujem načelniku Opštine Bosanski Petrovac, Zlatku Hujčiću, koji je, kao i uvijek, pružio pomoć i podršku u organizaciji. Zahvalio bih se i načelniku Petrovac-Drinić, Milanu Grbicu."

Druženje je nastavljeno uz domaćinsku atmosferu ispod šatora koji je postavljen nadomak crkve.



Na molitvi u mjesnoj crkvi

Dan slave Opštine Petrovac-Drinić

Dana 31.10.2017. godine načelnik Opštine Bosanski Petrovac, Zlatko Hujčić je po službenom pozivu prisustvovao Svečanoj sjednici Skupštine opštine Petrovac koja je održana povodom Dana slave opštine Drinić.

Svečana sjednica, kao prva u nizu od aktivnosti toga dana, počela je u 8:30, a kratko se obratio i načelnik Hujčić, pozdravio prisutne i čestitao praznik.

Također je rekao da se nada kako će saradnja naših Opština biti još jača i konstruktivnija u narednom periodu, imajući u vidu nekoliko projekata, koje naše opštine zajednički realizuju.

Riječ je o projektima Vijeća Evrope, koje su podržale plasteničku proizvodnju i proizvodnju lana (ILO).

U toku dana održana je i svečana liturgija u hramu Svete Trojice u Driniću, polaganje cvijeća, kao i bogat kulturno-umjetnički program.



Načelnik Hujčić na proslavi u Driniću

Zbor građana MZ Bravsko i Kapljuh

Dana 26.10.2017. godine u prostorijama mjesne zajednice Bravsko održan je zbor građana, na kojem su pored 30-ak građana mjesnih zajednica Bravsko i Kapljuh prisustvovali i predstavnici opštinskih službi Opštine Bosanski Petrovac, kao i vijećnici OV, Svetko Dukić, Dušan Došen i Marinko Mrđa.

Otvorivši sastanak, predsjednici mjesnih zajednica Duško Kecman i Anđelko Gvozdenović, istakli su da je ovo izuzetna prilika gdje su građani mogli da sve što ih zanima pitaju predstavnike službi i iz prve ruke dobiju odgovore.

Na dnevnom redu, pod tačkom aktuelni problemi u ove dvije mjesne zajednice, objedinjene su sve dosadašnje poteškoće, nedostaci, i izazovi sa kojima se susreće populacija ovih MZ.

Raspravljalo se o nasipanju puteva, vodovodu, povezanosti saobraćajnom komunikacijom MZ-grad, socijalnom i ekonomskom stanju bolesnih i iznemoglih, kao i o budućnosti onih najmlađih.

Mještani su iznijeli jedinstven stav da nisu ekonomski sposobni sami se nositi sa ovim, te je slijedom toga proizašao zaključak da se svi problemi objedine pisanim dokumentom, dostave predsjednicima mjesnih zajednica, kako bih oni uputili nadležnim službama na dalje postupanje.

Iz izjava građana moglo se utvrditi da im najveći problem predstavlja putna infrastruktura,

putevi koje paralelno s njima koriste i dvije šumarije, RS i Unsko-sanskog kantona.

Sastanak je organizovan na inicijativu načelnika Zlatka Hujića, gdje se nastojalo zajedno sa građanima i predsjednicima mjesnih zajednica prepoznati i imenovati probleme, kako bi se što prije razvio plan za mogući razvoj ovih mjesnih zajednica.

Ovakvi sastanci će se nastaviti u svim mjesnim zajednicama, sa istim temama, sve do kraja godine.



Mještani mjesnih zajednica na sastanku

Načelnik Hujić sa predstavnicima Saveza udruženja gluhih i nagluhih

U Kabinetu načelnika održan je sastanak, dana 17.10.2017. godine, na kojem je prisustvovao načelnik Hujić i predstavnici Saveza udruženja gluhih i nagluhih FBiH: Nikola Stanić, zamjenik predsjednika federalnog saveza gluhih i nagluhih, Sulejman Čaković, sekretar Saveza i Slobodan Novaković, predsjednik Udruženja gluhih i nagluhih u našoj Opštini.

Na samom početku sastanka predstavnici ove populacije su izrazili veliku zahvalnost na finansijskoj pomoći koju im je izvršna vlast uputila u proteklom periodu, te da se nadaju da će ta saradnja i dalje ostati na dobrom nivou i da će se praksa u rješavanju postojećih problema nastaviti.

Također, tokom susreta, iznijeli su prijedlog da se u budžetu Opštine Bosanski Petrovac uvrsti stavka, koja će se odnositi na određena novčana sredstva namijenjena Udruženju radi zadovoljenja potreba te populacije.

Govoreći o poteškoćama gluhih osoba, istaknut je problem nepostojanja adekvatnog prostora za okupljanje i rad za nekoliko njihovih štićenika u našoj Opštini.

Načelnik Zlatko Hujić je istakao značaj i potrebu većeg razumijevanja društva za probleme kako gluhih i nagluhih, tako i osoba s drugim oblicima invaliditeta da bi se uklonile predrasude i osobe sa invaliditetom tretirale kao ravnopravni

članovi društva, te je u tom smislu obećao nastaviti svaku moguću pomoć i podršku u njihovim aktivnostima.



Na sastanku u Kabinetu načelnika

25. godišnjica formiranja 5.korpusa

U okviru programa manifestacije, povodom 25. godišnjice formiranja 5. Korpusa, dana 20.10.2017. godine, predstavnici Opštine Bosanski Petrovac su položili cvijeće na Trgu šehida, kao i na mjestu spajanja 5. i 7. korpusa.

Obilazak mezarja i spomen obilježja obavljen je u svim gradovima Kantona, dok se centralna svečanost održala naredni

dan u Bihaću, gdje je u 10:00 sati bilo upriličeno polaganje cvijeća na mezarju Humci, obilazak kasarne „Adil Bečić“, u 11:00 sati, kao i svečana akademija u sportskoj dvorani „Luke“ u Bihaću, u 19:00 sati.



Svečana akademija povodom obilježavanja 25. godišnjice formiranja 5. korpusa

Povodom 25. godišnjice od formiranja Petog korpusa A RBiH, dana 21.10.2017. godine je u Sportskoj dvorani „Luke“, u Bihaću, održana centralna svečana akademija, u prisustvu boraca, komadanata, najviših predstavnika izvršne i zakonodavne vlasti svih nivoa u Bosni i Hercegovini, među kojima su bili i načelnici svih 8 općina USK-a, odnosno njihovi predstavnici.

Između ostalih, bili su prisutni bivši komadanti Petog korpusa Ramiz Dreković, Atif Dudaković i Salko Bukvarević, federalni ministar za pitanje boraca, te federalni ministar poljoprivrede, vodoprivrede i šumarstva, Šemsudin Dedić.

Organizacioni odbor obilježavanja ovog jubileja zahvalio se svim veteranima, komadantima, generalima, porodicama šehida i poginulih boraca, kao i institucijama koje su dale svoj doprinos u odbrani svoje zemlje.

Općina Bosanski Petrovac je i ovaj put, finansijski podržala manifestaciju.

Ovom prilikom su uručene plakete svim općinama Kantona, čiji predstavnici su ih primili, uključujući i općinu Bosanski Petrovac.



Uručenje plaketa

Mirko Kecman- petrovački šampion u kosidbi

Biti dobar kosac oduvijek je bila stvar prestiža, a imati dobrog kosca bio je ponos svake kuće, tako da se u kosce išlo pjevajući, a samo najbolji među njima bio je kosidbaša, koji je predvodio kosce.

Ipak, današnja savremena tehnologija i strojevi zamijenili su stare, i potisnuli tradicionalne običaje ručne kosidbe trave, kosačka druženja i akcije, te ih pomalo gurnuli u zaborav.

Na sreću još uvijek ima ljudi koji ovom zanatu ne daju da izumre i nestane, a jedan od takvih je višestruki šampion u kosidbi, Petrovčanin, Mirko Kecman.

Njegova "kosačka" priča počinje prije 9 godina, u Smoljani, kada se organizovala "Prva kosa Grmeča", a danas nakon 50 takmičenja održanih u svim zemljama bivše Jugoslavije, i oko 25 pobjeda, Kecman kaže da mu je najveći cilj da se tradicija košenja ručnom kosom očuva.

Pored ovoga, tradicija košenja sa sobom nosi jedan način života, satkan od entuzijazma, volje i borbe za opstanak krajiškog čovjeka na našim prostorima.

Njegujući kosidbu, folklor- u načinu oblačenja, čupanjem običaja od zaborava, čuva se identitet naroda, što daje najupečatljiviju dimenziju i smisao brojnih pehara, diploma i medalja koje je Mirko Kecman u Bosanski Petrovac donio sa takmičenja iz Srbije, Crne Gore, Slovenije, i ostalih zemalja bivše Jugoslavije.

Takmičeći se u ovim zemljama, Mirko Kecman je stekao iskustvo, prijatelje i temelj za saradnju, pa je ove godine preuzeo organizaciju u održavanju devete po redu manifestacije "Prva kosa Grmeča".

Dan Kosidbe, na obroncima planine Grmeč, sa bosanskopetrovačke strane, ostat će u sjećanju po prepoznatljivom zvuku kose, ručkom na kosačkom otkosu, šarenilu narodne nošnje, raznovrsnosti programa, susretu i druženju kosaca, mještana i Petrovčana koji su se iselili.

Njegujući tako tradiciju svojih pradjedova, prenošene s koljena na koljeno, Opština Bosanski Petrovac je, i ovaj put, finansijski podržala ovu manifestaciju, koja je odavno prevazišla ne samo lokalne, već i državne okvire, te u potpunosti poprimila međunarodni karakter.

Mirko Kecman je rođen 7. marta 1972. godine, živi u Bosanskom Petrovcu, sa suprugom i dvoje djece, trenutno radi u ŠG "Oštrej- Drinić", u Driniću kod Bosanskog Petrovca.



Mirko Kecman, Zorica Kecman (Mirkova supruga), načelnik Hujić

Uručena nagrada "Skender Kulenović"

Dodjelom nagrade "Skender Kulenović" književniku Seadu Mahmutefendiću za roman "Mjesto na kojem je neko pojeo cvijet", 24. oktobra je završena manifestacija "Dani Skendera Kulenovića", koja je ova godine obilježena po devetnaesti put.

Sead Mahmutefendić je bosanskohercegovački književnik. Rodio se u Sarajevu 1949. godine. U Konjicu je završio osnovnu školu i gimnaziju. Studirao književnost i jezike na Univerzitetu u Beogradu. Bio profesor srpskohrvatskog i latinskog jezika. Živi i radi kao školski bibliotekar u Sarajevu. Saradnik je u brojnim časopisima, novinama i radiju u Hrvatskoj, Bosni i Hercegovini i Srbiji. Piše prozna djela, romane, novele, eseje, kolumne, poeziju itd. Autor je brojnih prikaza književnih djela. Član je Društva hrvatskih književnika u Zagrebu i Društva pisaca u BiH u Sarajevu.

Djela su mu prevedena na ruski, engleski, španski, njemački, francuski, italijanski, holandski, makedonski i ermenski. Objavljena su mu izabrana djela u 2 knjige: Kelvinova nula, Ribe i jednooki Jack.

Naime, ovogodišnja manifestacija, organizovana je od strane Javne ustanove "Biblioteka Skender Kulenović" u saradnji sa Udruženjem pisaca Unsko-sanskog kantona, JU Kantonalnom i univerzitetskom bibliotekom, bosanskopetrovačkim Centrom za kulturu i obrazovanje, a svoj doprinos su dali i Mješovita srednja škola "Bosanski Petrovac" i Osnovna škola „Ahmet Hromadžić.

Održavanje manifestacije, kao i svake godine, pored Opštine Bosanski Petrovac, finansijski su omogućili i Vlada Unsko-sanskog kantona sa Ministarstvom obrazovanja, nauke, kulture i sporta.

Završnoj manifestaciji pored ministra obrazovanja, nauke, kulture i sporta, Muhameda Ramića, načelnika naše Opštine, Zlatka Hujića, prisustvovali su i brojni građani, djeca, književnici, i ostali predstavnici kulturnog i javnog života Bosanskog Petrovca.

Na samom početku obratili su se načelnik Hujić i ministar Ramić.

"Manifestacija "Dani Skendera Kulenovića" je značajna za sve. Opština Bosanski Petrovac je, kao i uvijek, pružila podršku ovom događaju. Podsjećamo da smo prošle godine uradili spomenik Petrovačkim velikanima, pa smo nakon 60. godina podigli spomenik Jovanu Bijeliću, zamjenili doslovno drvenu dasku sa spomenikom dostojnim jedne takve veličine. Važno je da se gradi taj odnos prema umjetnosti i bitnim ličnostima iz našeg grada. Jako bitno je da djecu tako vaspitamo. Nagrada Skender Kulenović je san velikih pisaca, jer je Skender obojan sa izuzetnom plemenitošću i veličinom", rekao je načelnik Zlatko Hujić.

Prisutnima se obratio i ministar Muhamed Ramić koji je istakao da je Bosanski Petrovac kolijevka ili "rasadnik" pametnih ljudi, te da Petrovčani imaju na čemu biti ponosni.

U programu su učestvovali učenici Mješovite srednje škole Bosanski Petrovac, učenice Osnovne škole " Ahmet Hromadžić " i učenici Umjetničke škole Bihać - Područno odjeljenje iz Bosanskog Petrovca . Učenike su pripremale i sa njima radili profesorice Gordana Balić , Jasmina Mehdić , Ljiljana Milošević i profesor Nedim Bakić .

Potom je uslijedio najsvečaniji trenutak, proglašenje dobitnika nagrade.

„Ovog puta bilo je zanimljivih knjiga i autora. Na prvoj poziciji našao se roman „Mjesto na kojem je neko pojeo cvijet“ kao najbolji roman autora, koji zaslužuje ovako prestižnu nagradu“, riječi su Senudina Jašarevića, predsjednika žirija.

Značaj ove manifestacije potvrđuje broj književnika koji na njoj učestvuju, kao i broj autora koji svake godine konkurišu za nagradu „Skender Kulenović“, koja je jedna od najznačajnijih koje se dodjeljuju u našoj zemlji, što su potvrdili i sami učesnici manifestacije.



Mahmutefendić, njegova supruga, i načelnik Hujić



Dobitnik književne nagrade „Skender Kulenović“, Sead Mahmutefendić

NK „Mladost“ Bosanski Petrovac

Dana, 19.10.2017. godine, na stadionu „Mladost“ u Bosanskom Petrovcu, mališani iz NK „Mladost“ odigrali su prijateljske utakmice sa svojim vršnjacima iz Drvara.

Učešće je uzelo 60 djece, a pobjeda je bilo na obje strane.

Predstavnici nogometnog kluba su se zahvalili mališanima i trenerima iz Drvara na dolasku, a i svima koji su pomogli da se ovaj susret organizuje.

„Zahvaljujemo se komšijama iz Drvara na fer i korektnoj igri, roditeljima koji su bodrili naše igrače, članovima uprave i trenerima koji su prisustvovali organizaciji, Opštini Bosanski Petrovac koja je, i ovaj put, obezbijedila sendviče i sokove za mališane, kao i na pomoći sudiji, Hidić Erminu i Safetu Husadžiću (Kapetan) koji je pripremio stadion za igru.“, naveli su iz Kluba.



Mališani na stadionu „Mladost“

Nezavisna bosanskohercegovačka lista u Bosanskom Petrovcu

U Domu kulture, dana 10.11.2017. godine, održana je tribina Nezavisne bosanskohercegovačke liste i predstavljena povelja političkog projekta u kojoj građani svih nacionalnosti, studenti, dijaspora, mladi ljudi, privrednici, nezavisni načelnici, pokušavaju stvoriti jednu alternativu za političku scenu BiH.

Tribinu s temom "Bosanskohercegovačka politika danas" vodili su predstavnici Liste: Ibrahim Hadžibajrić, načelnik Starog Grada i predsjednik NBL, potpredsjednici Zlatko Hujčić i Jusuf Arifagić, član predsjedništva NBL, Emir Salihović i profesor Rusmir Mahmutćehajić.

Skup je otvorio domaćin, načelnik Zlatko Hujčić, pozdravivši brojne građane naše Opštine.

Neophodne promjene u državi bile su glavna tema, a predstavnici su pokušali dati odgovor na aktuelno pitanje: Šta uraditi sa velikim brojem mladih ljudi koji u ovom momentu iseljavaju i napuštaju ovu zemlju.

"To možemo postići ako čovjek sa svojom egzistencijalnom ugroženošću, bude središte političkog djelovanja", istakao je načelnik Hujčić.

Jusuf Arifagić, veliki investitor i potpredsjednik NBL, rekao je da je jedini način sprečavanja odlaska mladih ljudi investiranje u puste, ali plodne njive, konkretno govoreći za Opštinu Bosanski Petrovac.

"Investiranjem i oranjem njiva, zatim sijaanjem, mi ćemo stvoriti novi život, proizvodit ćemo hranu, a samim tim eto novih radnih mjesta", također je istakao: "Vi, Petrovčani, imate jednu veliku manu, ne vidite bogatstvo kojim ste okruženi".

Nakon izlaganja, zainteresovani građani postavljali su brojna pitanja, potom komentarišući i izražavajući nezadovoljstvo

sadašnjom politikom, kako u našoj Opštini, tako i šire, pružili podršku nezavisnoj priči.

"Da bi se stvari riješile uvjereni smo da je snaga u služenju ljudima, a ne da ljudi služe nama u pogledu vlasti", rekao je Hadžibajrić, dodajući da za zdrav ekonomski program mora postojati zdrava politička platforma.

Nezavisna bosanskohercegovačka lista formirana je 30.9.2017. godine na osnivačkoj skupštini u Sarajevu, na kojoj su delegati iz Bosanskog Petrovca, Srebrenice, Srebrenika, Goražda, Mostara, Kaknja, Zenice, Kalesije, te devet opština Kantona Sarajevo poručili da će nova politička inicijativa u BiH pružiti boljitak svim narodima u državi, bez obzira na njihovu nacionalnost.

Protekle sedmice, NBL se predstavila građanima BiH, a svi koji su za državu sa građanskim opredjeljenjem dobrodošli su da se priključe Nezavisnoj listi.



S lijeva na desno: Rusmir Mahmutćehajić, Zlatko Hujčić, Ibrahim Hadžibajrić, Jusuf Arifagić, Emir Salihović

UNHCR donirao sredstva za ekonomsku održivost

Dana, 14.11.2017. godine donator UNHCR u saradnji sa partnerom Hilfswerk Austria International je u okviru projekta „Pružanje pomoći za održivost raseljenim licima i povratnicima i podrška UNHCR-a pri upravljanju podacima“ izvršio isporuku pomoći za ekonomsku održivost korisniku, Draganu Romčeviću, iz Bukovače u vidu samohodne motokosačice i motorne pile.

Svrha projekta je da kroz nabavku roba/sredstava korisnici Projekta (povratnici i raseljena lica) na području šest opština/gradova u BiH, kao i putem Interventog fonda UNHCR-a u ostalim opštinama/gradovima BiH kroz samozapošljavanje ostvare prihode i olakšaju integraciju/reintegraciju u sredinama u kojima žive.

Azema Avdušinović, Projekt menadžer ispred Hilfswerk Austria International, je rekla da će ovo sigurno doprinijeti njegovom ekonomskom osnaživanju i ostvarivanju prihoda.



Azema Avdušinović, project menadžer Dragan Romčević, korisnik



Dodjelom nagrada uspješno realiziran projekat „Kompostiranje bio-otpada na području Unsko-sanskog kantona“

Povodom završetka implementacije projekta „Kompostiranje bio-otpada na području regije Bihać 2017.“, a koje provodi Ministarstvo za građenje, prostorno uređenje i zaštitu okoliša USK, u Bihaću je dana, 13.11.2017. godine, upriličeno svečano proglašenje najuspješnijih mjesnih zajednica, preduzeća i ustanova.

Projekat se u USK, pa tako i u našoj Opštini implementira od 2013. godine.

Naime, prvo mjesto u Bosanskom Petrovcu, u kategoriji mjesnih zajednica osvojila je MZ Bravsko, drugo mjesto MZ Vrtoče, a treće mjesto MZ Grad I, a kad je riječ o ustanovama, prvo mjesto je osvojila OŠ "Ahmet Hromadžić".

Nagrade su novčane. Za kategoriju mjesnih zajednica, Ministarstvo za građenje, prostorno uređenje i zaštitu okoliša USK izvršit će transfer u iznosu od 2000 KM, za prvo mjesto, 1500 KM, za drugo mjesto, 1000 KM za treće mjesto, a za kategoriju preduzeća i ustanova, nagrada iznosi 1000 KM.

Mjesec dana nakon dodjele sredstava mjesnim zajednicama, preduzećima i ustanovama predsjednici mjesnih zajednica i predstavnici ustanova i preduzeća, koji su i preuzeli nagradu, trebaju opštinskom timu dostaviti izvještaj o utrošku, a Opština nakon što ih kompletira dostaviti Ministarstvu.

Dodijeljena sredstva nagrađeni predstavnici dužni su utrošiti u dalje aktivnosti očuvanja životne okoline.

Svrha ovog projekta je animirati stanovnike mjesnih zajednica da korištenjem kompostana počnu vršiti selektiranje otpada, upoznati ih sa prednostima kompostiranja, podizati ekološku svijet, te doprinijeti cjelokupnoj kampanji uključivanja javnosti u okviru integrisanog upravljanja otpadom.

Predstavica Ministarstva, Mersija Talić, izjavila je da je ovo posljednja godina realizacije projekta, osim, ako opštine i mjesne zajednice pokažu zainteresovanost da se projekat nastavi.



Nagrađeni učesnici

„Jesenji sajam 2017“ u Banja Luci

U periodu od 16. do 19. novembra u Banja Luci na „Jesenjem sajmu 2017“ predstavljeno je više od 200 izlagača, među kojima i opštine Drvar, Istočni Drvar i Petrovac (Drinić) koje zajedno sa našom provode aktivnosti na projektu „Razvoj plasteničke proizvodnje pokretanjem međuentitetske i međuopštinske saradnje“.

Na ovoj tradicionalnoj manifestaciji koja je otvorena 16. novembra u „Banjalučkom velesajmu“ posjetioci su do 19. novembra imali priliku da obiđu 130 štandova na kojima su se predstavili izlagači iz oblasti lova, ribolova, ekologije, sporta, turizma, ugostiteljstva, poljoprivrede i prehrambene industrije.

Predstavnici naše opštine su se predstavili na zajedničkom štandu koji su dijelili sa gore navedenim opštinama.

Žene, korisnice plastenika, na sajmu su imale prilike promovirati i prodati proizvode koje su proizvele u plastenicima i na poljoprivrednim imanjima.

Štand naših opština su krasili upravo ćilimi sa prepoznatljivim „Bolića kolom“, med i čajevi sa mednih i ljekovitih polja, domaća šljivovica, likeri od drenjina, džemovi, pekmezi, raženo brašno i ostali proizvodi...

Opšti dojam korisnica je da je ovo bilo dobro iskustvo, te da su ostvarile brojne kontakte koje će dalje koristiti za plasman svojih proizvoda.

Učešće na banjalučkom sajmu je jedna od posljednjih aktivnosti predviđena ovim Projektom, a završni događaj promocije svih projekata koje je finansirao Savjet Evrope ove godine u BiH se očekuje u decembru u Sarajevu.



Izgled štanda ispred naše Opštine na „Jesenjem sajmu“



Održana 12. redovna sjednica

Dana, 15.11.2017. godine u Vijećnici Opštine Bosanski Petrovac, Opštinsko vijeće je održalo prvi dio 12. redovne sjednice.

Nakon određenih izmjena i dopuna, dnevni red je usvojen, te su uslijedila vijećnička pitanja i odgovori.

Potom, rasprava je ulijedila u pravcu tačaka koje se tiču budžeta, u sklopu kojih je usvojeno sljedeće: Informacija o izvršenju budžeta opštine za 01.01.-30.09.2017. godine, Analiza potraživanja i obaveza opštine.

Nakon toga donesena je Odluka o izmjenama i dopunama Odluke o Budžetu naše Opštine za 2017. godinu – rebalans budžeta.

Načelnik Zlatko Hujic je tokom sjednice povukao predloženu Inicijativu Vladi i Skupštini USK-a za smjenu direktora USŠ d.o.o. Bosanska Krupa- Harisa Mešića i preinačio u Zaključak kojim se želi izraziti generalno ogromno nezadovoljstvo građana Opštine Bosanski Petrovac odnosom Vlade USK i USK šuma, prema Opštini, naročito kao povratničkoj sredini.

Ovaj zaključak će biti predložen na usvajanje na prvoj sljedećoj redovnoj sjednici.

Dana 29.11.2017. godine, u Vijećnici Opštine Bosanski Petrovac, održan je nastavak 12. redovne sjednice Opštinskog vijeća.

Nakon utvrđivanja prisutnosti vijećnika, vijeće je počelo s razradom utvrđenih tačaka.

Donesena je Odluka o utvrđivanju vrijednosti boda za komunalne naknade za 2018. godinu, kao i Rješenje za utvrđivanje prava vlasništva u korist Zorić Dušana.

Donesen je Zaključak o provođenju Javne rasprave, koja je vezana za Nacrt Programa rada Opštinskog vijeća za 2018. godinu.

Tačka koja se odnosi na razmatranje prijedloga odluke za izbor članova upravnih i nadzornih odbora Javnih ustanova i preduzeća, kao i direktora JU „Centar za kulturu i obrazovanje“ će se naći na sljedećoj redovnoj sjednici, 4. decembra.

Primljena je k znanju neopoziva ostavka predsjednika MZ Bjelaj, Suada Šabića, te je nakon toga donesena odluka o raspisivanju izbora za članove Savjeta i predsjednika ove MZ. Odlučeno je da za ovaj period do izbora, povjerenik bude Rajko Petrović.

Donesena je Odluka o potvrđivanju izbora za predsjednike i Savjete mjesnih zajednica: Bukovača, Suvaja, Kolunić i Vrtoče.

Prijedlog načelnika o Raspisivanju javnog poziva o davanju u zakup državnog zemljišta (Oraško brdo, Prkosi, Krnjeuša), vijećnici nisu podržali. Podsjećamo da je Opštinsko vijeće, dana 29.6.2017. vratilo ovaj isti prijedlog na dopunu, uz određene primjedbe, koje su u potpunosti ispunjene i kao takve, predočene vijećnicima, u vidu novog prijedloga. Naravno da će nedonošenje Odluke o raspisivanju Javnog poziva radi davanja u posjed državne zemlje imati dalekosežne negativne posljedice.

Nakon toga, donesena je Odluka o prodaji, neposrednom pogodbom, neizgrađenog građevinskog zemljišta koji se nalazi u k.o. Vrtoče, kao i Odluka o proširenju industrijske zone koja nosi sa sobom potrebu za izmjenom i dopunu Regulatornog plana industrijske zone.

Na samom kraju sjednice je usvojen prijedlog Rješenja o dodjeli građevinskog zemljišta pravnom licu iz Sarajeva.



Na sjednici OV

Jačanje lokalnih zajednica kroz saradnju sa dijasporom

Dana, 20.11.2017. godine u Sarajevu je Ministrica za ljudska prava i izbjeglice BiH, Semiha Borovac potpisala Memorandum o saradnji u oblasti iseljništva sa 28 gradonačelnika i načelnika u Bosni i Hercegovini, među kojima je bio i načelnik naše Opštine, Zlatko Hujic.

Prema riječima državne ministrice, jačanje kapaciteta jedinica lokalne samouprave za rad sa dijasporom i razvijanje lokalnih projekata dvije su ključne komponente kada je riječ o uključivanju iseljništva u lokalni razvoj.

“Ovim Memorandumom ostvarujemo trajnu saradnju sa lokalnim zajednicama za čije će osoblje Ministarstvo pružiti obuku kako bi im pomoglo da rade sa iseljništvom na pravi način”, istakla je Semiha Borovac.

Ona je navela da će na osnovu potpisanog Memoranduma biti napravljena mreža koordinatora iz lokalnih zajednica koji će biti zaduženi za saradnju sa iseljništvom čime će ono biti i mapirano.

Navela je da će uz pomoć partnera i to, prije svega, Vlade Švajcarske koja je obezbijedila sredstva za realizaciju projekta “Dijaspورا za razvoj”, u jačanje novih kapaciteta lokalnih zajednica biti utrošeno oko 1,3 miliona KM, a da će milion KM

u vidu granta biti na raspolaganju lokalnim zajednicama za ove inicijative.

Načelnik Hujic ocijenio je da je dijaspora vrlo bitan faktor finansiranja u Bosni i Hercegovini, pa time i opština, te je istakao da je potreban zajednički rad kako bi se stvorili bolji uslovi za kulturnu, sportsku, obrazovnu i svaku drugu saradnju.

Podsjećamo na Ured za dijasporu koji je oformljen u Bosanskom Petrovcu, u ljeto ove godine, nakon Kozarca (Prijedor), koji je to uradio par mjeseci prije naše Opštine.

Za ovu saradnju je, za sada, predviđeno 10 zemalja.



Na potpisivanju Memoranduma o saradnju sa iseljništvom

Svečana akademija povodom Dana državnosti BiH

U Domu kulture, dana 24.11.2017. godine, povodom obilježavanja Dana državnosti Bosne i Hercegovine, održana je Svečana akademija na kojoj su prisustvovali brojni građani Opštine Bosanski Petrovac.

Na samom početku predsjedavajuća OV je otvorila Svečanu sjednicu OV, pozdravila goste čestitajući Dan državnosti.

U daljem toku sjednice, prisutnima se prigodnim govorom obratio načelnik Zlatko Hujčić koji je uputio čestitku svim građanima i narodima Bosne i Hercegovine povodom ovog važnog datuma, te poručio da se nada da će ekonomija nadvladati politiku, i da će se zaustavi tendencija odlaska mladih kako iz države, tako i iz naše Opštine, "Bosne i Hercegovine u malom", misleći na kulturne i vjerske različitosti, koje su bogatstvo kojim se ponosimo.

Kulturno-zabavni program otvorili su najmlađi i najslađi, mališani Dječijeg vrtića, a potom su svojom kreativnošću i sposobnostima publiku zabavljali učenici srednje i osnovne škole, kao i polaznici Umjetničke škole iz Bihaća, područno odjeljenje iz naše Opštine.

Svečanoj akademiji su prisustvovali predstavnici kulturnog i javnog života, vijećnici OV, direktori

javnih ustanova i preduzeća, roditelji učesnika i mladi izdanci naše Opštine.

Ranije u toku dana, položeno je cvijeće na spomen-obilježja našeg grada, a upriličena je i posjeta brojnih gostiju iz Slovenije, koji svake godine obilaze mjesta gdje je utemeljena borba protiv fašizma.

Cilj posjete je obilazak Doma kulture, cijeneći činjenicu da je bio domaćin prve zemaljske konferencije AFŽ-a (Antifašističkog fronta žena) 6. decembra 1942., i partizanskog groblja.

Za sljedeću godinu, kada se obilježava 75. godina od zasjedanja AVNOJ-a, dogovorena je još masovnija posjeta od strane ovih gostiju.



Dom kulture, Dan državnosti, 24.11.2017.

VI konferencija načelnika i gradonačelnika u Sarajevu

Dana 28.11.2017. godine, Agencija za državnu službu Federacije Bosne i Hercegovine, na inicijativu Koordinacionog tijela za obuku u okviru Sistema obuke za jedinice lokalne samouprave u Federaciji Bosne i Hercegovine, organizovala je Šestu godišnju konferenciju „Dobra obuka-bolja uprava“, na kojoj je učestvovao načelnik Opštine Bosanski Petrovac, Zlatko Hujčić.

Inače, ciljnu grupu su činili gradonačelnici i načelnici, kontakt osobe za obuku iz jedinica lokalne samouprave, predstavnici kantonalnih ministarstava za pravosuđe/pravdu i upravu i predstavnici međunarodnih organizacija.

Svrha održavanja konferencije je razmjena informacija o trenutnim aktivnostima i projektima koje implementiraju međunarodne organizacije u Bosni i Hercegovini, sa posebnim osvrtom na razvoj kapaciteta u jedinicama lokalne samouprave u BiH.

“Ovaj skup predstavlja odličnu priliku za razmjenu mišljenja i iskustava za produbljevanje međusobne saradnje, te stvaranje mogućnosti za uvođenje promjena u svakodnevnom radu u cilju jačanja odgovornosti prema građanima i stvaranje ambijenta za veće povjerenje građana”, istakao je načelnik Hujčić.

Konferencija je imala za cilj da kroz otvorenu diskusiju iznjedri zaključke koji bi mogli doprinijeti daljnjem unapređenju Sistema i razvoju projekata za ovu ciljnu grupu.

U okviru diskusije istaknuto je da sistem obuke za jedinice lokalne samouprave u BiH ne bi imao današnji okvir bez podrške donatora, među kojima su najznačajniji, Ambasada Kraljevine Švedske, Razvojni program Ujedinjenih naroda (UNDP), vlada Austrije, Slovačke i Velike Britanije.

Na konferenciji je prisustvovalo oko stotinu sudionika, načelnici općina i gradonačelnici s prostora Federacije Bosne i Hercegovine, predstavnici kantonalnih ministarstava za pravosuđe/pravdu i upravu, predstavnici međunarodnih organizacija, te zvaničnici Agencije za isporuku integriranih usluga Albanije.



Konferencija "Dobra obuka-bolja uprava"



"Nasadjeni kamen" u "Karanfil mahali"

Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

**Slušajte Radio Bosanski
Petrovac od 15:00-17:00,
svakim danom na 90.9 MHz fm**